

Delegacion di Aruba ta presenta excelente teatro 'Cambio di Horizonte' na Corsou

Despues cu delegacion di Aruba, bao di direccion di Amy Lasten a participa cu e excelente obra di teatro: "Cambio di Horizonte" na Brazil, Francia y Hulanda den e proyecto Internacional di Integracion Changing Horizons, nan ta bay presenta e obra teatral aki awor, riba invitacion di Teatro Luna Blou na Corsou. Autor y iniciador di e proyecto aki t'e Director renombra Hulandes, Nicoline Nagtzaam, kende a haci e direccion final n'e paisnan ariba menciona..

E obra integra p'e diferente paisnan a gana e prestigioso premio internacional di Learn for Life na Hulanda. E version Arubiano di e obra aki a ser presenta na october 2010 na Aruba y eyan caba nos por a disfruta di un excelente direccion di Amy Lasten, y actuacion sublime di John Freddy Montoya, Marjorie Luidens y Mad-

elene Kelly. Magistral tabata e xenografia di Ryan Oduber kende a proyecta imagennan hopi interesante riba curpa di e apartamento di nan vivienda cu tabata traha di tela. Ademas e weganan di sombra a sobresali masha den e obra aki. Especialmente Zulaica Coffie y Mirto Tromp a crea un espectáculo masha sensual den e wegana di sombra.

Dario Medina a hunga e interesante papel di e ruman cu ta mas pega na su isla natal y cu ta dicidi di regresa na su pais. "Cambio di Horizonte" ta un obra moderno- contemporaneo di caracter multi-disciplinario cu ta trata e polemico y tema complica di inmigracion. E obra ta conta e historia di un famia cu tin cu emigra di un humilde aldea pa un pais desconosi, den e caso aki One Happy Island Aruba. Aki cada miembro di e famia ta topa cu

otro forma y manera di biba. Nan ta confronta diferente obstaculo, obligando nan pa biba e complicacion y trabou cu e cambio drastico di un pais pa otro ta trece cu ne sin preparacion y mas pio sin un status legal.

E weekend di 28,29 y 30 di juni awor, pueblo di nos hermana isla Corsou tin e oportunidad pa disfruta di e excelente obra aki na La Tentacion. Loke ta haci e obra aki mas interesante ainda ta, cu e elenco aki no a keda presenta e mesun obra cu a ser crea for di inicio, pero nan a elabora e obra aki pa cada presentacion n'e diferente paisnan y e biaha aki e presentacion lo haci uzo di proyeccion di imagen via un camara cu ta riba e escenario caminda actornan mes ta maneha.

Ryan Oduber ta haciendo un excelente trabou riba e tereno aki, cu ta duna e obra un toke



hopi inovativo. Den cuadro di cambianan cu e obra aki ta pasa den, e hobennan John Lopez y Alfred Morillo ta forma parti tambe awor di e elenco y ta hungando un papel hopi interesante como dos ruman mas cu ta imigra cu e mama pa Aruba for di un pais Latino America.

Danki n'e tremendo cooperacion di Prins Bernhard Cultuurfonds cu ta promove desaroyo di teatro na nos islanan riba un forma duradero y

cu ta apoya tambe intercambio teatral entre e islanan, e presentacion di e obra Cambio di Horizonte a bira posibel e weekend benidero na Corsou. Tambe e fondo de Mondriaanstichting a duna un tremendo sosten financiero cu ta yuda haci e presentacion aki posibel. FARPA ta gradicido tambe n'e cooperacion cu Departamento di Cultura ta dunando pa realisacion di e presentacion aki.